

Afɛ mgbi iPol ongwi ababɔ mbi iTimoti

¹ Afɛ nɛ kyɛ mbi ani, iPol, ongye ogbikye iYesu iKrestu mi Ola mgbi Imgbasho Onagbɛ eyi bɛyi iYesu iKrestu nli ɛwɛ ogbe byiilbyi mgbi eyi nani.

² N le lɔ mbi iTimoti ongwani mi oyɛyɛ onuunu na gbɛɛ:

Ni Otseyi Imgbasho bɛyi Otɛ iYesu iKrestu mgbi eyi na nu abu mse yi elela bɛyi iyu.

*Adɔ okwookwo ikye ama otso
ola atsika*

³ Onɔ ngwi ani le lu iMasidonia ma, ani nya abu gbɛɛ ni abu tila dɛ Efesu dile fwa yi ama ngwu otsootso mgbi ama li otsitsi ba ntonani.

⁴ Nu ma ka yama gbekabyi utsa otsaatsa bɛyi odɛ etɔ ogbɔɔgbɔ nli dondu ba na ba. Ungwɔ ntonɛ li ba yi angwodɛ ayayi ta, li yama ba yi okiyayi mgbi idɔ mgbi Imgbasho nli mi oyɛyɛ onuunu na ba.

⁵ Itɔdɛ mgbi otsootso nɛ yɔ, li okpitukwu, nkyɛ mi itukwu osaan, yi ewodɛ osuse mi itukwu bɛyi oyɛyɛ onuunu otsitsi mani.

⁶ Angbeka dzata ungwɔ ntonɛ di kyata le gbɔdɛ ama nli ayayi ta.

⁷ A mina oli etsetse mgbi ola, kpaa a ye ungwɔ ngwi a tole gbɔ ma ba, nghaduu a di tole gbɔn yi abɔ otsigɛɛ.

⁸ Eyi ye gbɛɛ ola mgbi iMose tishi, kini inggise kɔɔ oyabo yan saan yɔ.

⁹ Eyi di ye dafi ola dɛɛ mi ikye mgbi ama osaan ba mani, kpaa dɛɛ mi ikye mgbi ama ofoola, yi ama onghaado, yi ama n ye Imgbasho ba, beyi emi ali ibwubwe, yi ama nle saan ba, yi ama okɔɔ Imgbasho ido ba, yi ama nngwo ama omba ma, beyi ama ogbongwo inggise.

¹⁰ Di dɛɛ ikye inggise ama okɔɔ amah yi ali ito idza duu, yi ama ogbe ofyɛɛ gya, yi ama ogbatsika, beyi ama ofa mi otsitsi ba, beyi ama nli kɔɔ alungwo angbeka duu ndɛɛ idzidza yi otsootso osuse,

¹¹ ngbela yi Eso Osuse okwɔkwɔ mgbi Imgbasho onghaangha, ngwi o kye wo ani abo nɛ ba mani.

Elela mgbi Imgbasho mbi iPol

¹² Ani ta Otse mgbi eyi iYesu iKrestu angba, ongwu nnu ani mfyɛ di kye ani gbɛɛ ani li inggise oyeyɛ, di dula ani gbɛɛ ni ani kyɔn ido neni.

¹³ Ngwi ani nose li inggise okwu iyi iYesu fyito di nu emidan iso kpakpa, yi ablodɛ okyɔɔkyɔ nɛ kpaa, Imgbasho di ani elela ikyekye n kɔɔ mi inɛ obuubu yi oyeyɛ onuunu ba.

¹⁴ Otse Imgbasho mgbi eyi kye elela mgban yawo ani dzii, di kye yi oyeyɛ onuunu beyi okpitukwu ama ndɛɛ mbi iYesu iKrestu nani.

¹⁵ Odɛɛ nɛ, li odɛɛ ogbelan mi itukwu onyi gbɛɛ: iYesu iKrestu ba ɛɛ owa dula emi ali ibwubwe ama ngwu ani nghao li inggise obube mboma nɛ to.

¹⁶ Mi itodɛɛ nɛ, Imgbasho di ani nnghao li inggise obube nɛ elela, adzi ni ani li ambe mgbi itukwu oshiishi mgbi iYesu iKrestu nle dzii mbi

ama nkawa nun oyeye di tu oshishe igyegwu mani.

¹⁷ Oshewo yi okwɔkwɔ duu no dze yi Uto nli gyegwu, nka kwulu ba, ngwi ine li din kpaa ba, ongwu nli Imgbasho yuon nghataa mbinose nani. No dze ngha.

¹⁸ ITimoti, ongwani, ani le wo abu ola mi odze ngwi a tsekise yegbo mi ikpewo abu ma, ikyegbɛɛ ni abu kyo mi ele yo, o ka li inggise ogblika saan.

¹⁹ Onu abu kyungwɔne yo, o ka dze yi oyeye onuunu kpɔklɔɔ yi ewodze osuse mi itukwu, ngwi inggise angbeka fwan ni oyeye onuunu mgbi ama ngwiingwi.

²⁰ Mi idzidze ma, li iHimenayo yi Alekidzanda, ngwu ani kye ma wo iSatan abo ikye no ngwunu ma, adzi nu ma nya okwu Imgbasho shanye ntonani.

2

Ola ikye osusunu

¹ Nghane ungwɔ ongwɔ ababo yo, n mina gbɛɛ ni abu bibo di tekye yi angba otaata kpakpa nu Imgbasho ikye ali inggise duu.

² Ne bibo ikye emi uto yi ama mfye byito abo ma duu adzi ni eyi dze mi iyu yi oshishe oshilididi dafi eyi le sunu Imgbasho di kwakwafo ese nun neni.

³ Ungwɔne tishi di li ungwɔ okpa Imgbasho ongye Onagbe eyi,

⁴ ongwu nmina gbɛɛ ni ali inggise duu tu owato-wato di ye otsitsi nani.

⁵ Bana Imgbasho li onyi ta, inggise oyile inggise gyiide yi Imgbasho kpaa li onyi, li iYesu iKrestu,

⁶ nkye ewon nu ikye odulu ali inggise duu wato nani. Imgbasho kye ungwone tso eyi ngwi onwa gyo yeye mani.

⁷ Di li itodze ne ngwi a dula ani oli inggise ogbeeso di gbikye iYesu, otso Udzengye duu eso mgbi oyeye. N le gbo otsitsi, yama li atsika ba.

⁸ Nghane ani mina engyulo nu ma kyile abo mgbi ama osaan mi ali imbe ngwi a to duu bibo, no ka li mi itukwu owulu-wulu hona angwodze ba.

⁹ Ani di mina gbese engyaa nu ma me ewo saan, yi ozoyeye no di gyogyo kpaa. No ka li mi otu omeme mgbi ala hona mi abashi naadi mi ungwao ama ofyunfyummya hona tagwude naadi angwuto ofyunfyummya ba,

¹⁰ kpaa no li mi okyokyo osuse ngyo mbi engyaa ama nli sunu Imgbasho mani.

¹¹ Ongyaa no kpayi ungwao shilididi yi ewo oyile ese menemene.

¹² Ani nu ongyaa ofe otsungwo naadi dze yi mfyee mi ikye ongyulo ba, kpaa no dze shili.

¹³ Lubana a teyi me Adan se Ifa.

¹⁴ Li Adan ngwu a kpagyanwo ba, li Ifa ngwu a kpagyanwo di yee okyo obube aali.

¹⁵ Nghaduu engyaa ka wato mi onwa ombimba kini a kiyayi yi oyeye onuunu yi okpitukwu yi osaan yi okwu blii yo.

3

Engyukwo emi iKrestu

¹ Elodze ne li otsitsi gbese: kini inggise kye itukwu mgbani byi ogbe inggise teyi mi okwakye mgbi emi iKrestu yo, o mina ido osuse.

² Nghane inggise ogbe inggise teyi li ongwu ndze yi iyi osuse kyeme-kyeme, o ka li inggise ndze yi ongyaa onyi, o ka li inggise okyitingga ba, ka li inggise obwa ewon fyii, inggise ngwu a li nun mmwe, inggise nle wawa, inggise nka yagba otsungwo,

³ no ka li inggise ngwu ebye gban itukwu so ba, inggise ohaha ba kpaa inggise ngwu dze dumoo, inggise ogbonogbe ba, beyi inggise nli tsoosho awuya ba.

⁴ O ka li inggise nka gbewebyi eto mgban saan kyeme-kyeme diye di gbee engbe mgban siikyenun mi ofe oyeye.

⁵ (Ni inggise ye ogbewebyi eto mgban ba ma, kyonese o ka gbewebyi okwakye mgbi emi iKrestu?)

⁶ Ka dulu inggise nkwa kyatitukwu nu ogbe inggise teyi mi okwakye mgbi emi iKrestu ba, bana, o ka yee okyile ewo esho a dika ngwon ikwo dafi olodu tugbe nani.

⁷ O ka li inggise ngwu ama nnoyeye ba kpaa li nun mmwe, ikye ngwi o ka gyayiwi di gbee mi ukya mgbi olodu ba mani.

⁸ iDikin kpaa, ka li inggise ama ndze yi ali osuse, ama ndze yi otsitsi, ama ngwu ebye gbe ma itukwu so ba, a dika li inggise ama otsosho awuya ba.

⁹ Li ikyeme ngwi a ka kye abo byi otsitsi mgbi oyeye onuunu kpini yi itukwu asisa.

¹⁰ A ka teyi mbadi ma kyeme se, ni a wende bayo, ni a kye ma ido iDikin.

¹¹ Li ngha yeye ngwi owa ma kpaa ka dze yi ali osuse aali, a ka li ama okye ondu wo inggise ewo

ba kpaa, a ka li ama nbwa ewoma fyii di li ama a nu ma oyeye mi alungwo duu.

¹² IDikin ka li inggise ndze yi ongyaa onyi dika yagba gbewebyi engbe mgban beyi eto mgban saan.

¹³ Ama nkyido iDikin saan yo, a ka tu iyi osuse a dika nghao dze yi abo otsigege mi oyeye onuunu mgbi ama mbi iYesu iKrestu.

¹⁴ Ani dze yi oweka oba mbi abu vla, kpaa n le lo abu afe ntono ikyegbee,

¹⁵ ni ani wa mbe ono kpaa, abu ka ye dafi inggise ka kye ewoma dze mi idzidze emidi Imgbasho, ngwi li okwakyegbi emi iKrestu mgbi Imgbasho oshishe, otlese yi itozu mgbi otsitsi nani.

¹⁶ Iba mgbi odzimgbasho mgbi eyi shewo, inggise kpaa ka yagba tangwe ba:

O ba dafi inggise owamye,

Onodzi kyon tso gbegbe o li otsitsi

mi ine Imgbasho,

engyeso din,

a kyon gbo kpatse ali

udze mi ese duu,

a nun oyeye mi ese,

a kyon lu esho mi okwokwo.

4

A kwo iTimoti ado

¹ Onodzi Osaan gbo saan gbegbe ono kyema ngwi inggise angbeka ka dzata oyeye onuunu di kyedo onodzi ama okpagya inggise wo beyi otsootso mgbi enedzi ibwubwe.

² Otsootso ntona kye mbi emi ikpala ama omwonya, ngwi ewodze mgbi ama li ikwukwo, a yama ye idzidza mgbi ungwɔ obube yi osuse wuba.

³ A li kwɔ inggise ongyaa okyeekye di li wo inggise ola gbɛɛ nu ma ka gye ungwogyɛ angbeka ba, ungwogyɛ ama Imgbasho ta gbɛɛ ni inggise ama nnoyɛyɛ di ye otsitsi nu ma gye yi atsa neni.

⁴ Bana alungwo ngwi Imgbasho ta duu tishi, unkonyi ngwi a ka fwan dzema ba ni a gbɛ yi angba yɔ,

⁵ lubana a kye melu dzɛkɛ saan mi ibɔ beyi elodzimgbasho.

⁶ Ni abu gbɔ ungwɔ ntonɛ nya ama onoyɛyɛ yɔ, abu ka li ongbidɔ osuse mgbi iYesu iKrestu, ngwu a nyɛ abu mi ofɛ otsitsi mgbi oyɛyɛ onuunu beyi otsootso osuse ngwi abu kyɛdɔ mani.

⁷ Odze no ka kwokyi abu yi utsa ayayi beyi utsa ogbugbe mgbi enengyaa ntona ba; tatase nyɛ ewabu ni abu li inggise Imgbasho.

⁸ Lubana onyɛ ewabu mi mmbwɛ yi eyi dze yi oyabɔ, kpaa onyɛ ewabu mi ofɛ mgbi Imgbasho yɔ, nghao yaabɔ duu, ikyekye ondu odzɛɛdze mgban dze ikye oshishe ongwɔ onɛnɛ beyi oshishe nkawa ba nani.

⁹ Elodze nɛ li elodze otsitsi, ngwi i wogyɔ ogban abɔ efa.

¹⁰ Ikyenghanɛ, eyi le kyidɔ kpakpa dile gbili gbɛɛ ni eyi kye ɛwɛ mgbi eyi byi mbi Imgbasho oshishe, ongwu nli Onagbɛ mgbi inggise duu, onghaangha duu yɔ, mgbi ama nnoyɛyɛ nani.

¹¹ Tsungwo ntonɛ diyɛ di gbɛɛ ali inggise duu kyɔ mi ele.

¹² Ka nu inggise onyi kpaa kwu abu shanye gbæe abu li mmafa ba, nghaduu tso ama onoyeye ambæ mi odze ogbɔɔgbɔ yi oshishe mgbi abu yi okpitukwu yi oyeye onuunu beyi mi odze saan kpaa.

¹³ Duuse ni ani wa ba yɔ, kye ewabu tswokɛ ole gbɔ Afe mgbi Imgbasho nya inggise mi ododa, nu ma osa mi ele dile tso ma.

¹⁴ Ka dzita umba mgbi abu ngwi Imgbasho kye nu abu nye mi esɔ mgbi oyegbɔ mi onɔ ngwi engyukwo kye abɔ dɔ abu ikye na ba.

¹⁵ Gbekabyi ungwɔ ntoneni, kye ewabu duu nu mi efu, ikye ni ali inggise di okiyayi mgbi abu.

¹⁶ Kyidi oshishe yi otsootso mgbi abu saan. Byi ma kpɔklɔ, ikyekye ni abu kyɔ ngha yɔ, abu ka dulu oshishe mgbi abu yi ama nle fwo abu ma wato.

5

Odze owe emi owakwade yi engyukwo beyi ofyɛ

¹ Ka kyɔkyɔ odze yi ishongye mi okwushanye ba, kpaa gbɔ yan mi iyu dafi o li otsabu mani. Kyɔ yi mmafa dafi emi ongwunabu,

² kyɔ yi enengyaa kpaa dafi emi onabu, yi engyaa ikyakyawa dafi emi ongwunabu mi ofɛ osaan.

³ Gbewɛbyi owakwade ama ndze abubɔ mani.

⁴ Nghaduu ni owakwade dze yi engbɛ naadi engwiba yɔ, ni engbɛ ntona di mbi etɔ mgbi ama saan otso oyeye onuunu mgbi ama mbi Imgbasho di kpa ama nmba ma mkpa, bana li ungwɔ okpa Imgbasho.

⁵ Owakwade ngwu dze abubo di dze yi inggise oyan abo bayo, no kye itukwu mgban byi mbi Imgbasho di bibo otu yi ono gbɛɛ no yan abo.

⁶ Nghaduu owakwade nkye ewon nu mi ɛɛ ogyeegye yo, dafi o li oshishe ne kpaa o li ikwukwo mi onodzi.

⁷ Tso ama onoyeye kpaa ungwɔ ntoneni, ikye ni a ka nu ma obube ba mani.

⁸ Kini inggise ya odon abo ba, onghaangha duu eto mgban ongwɔ ozu yo, o tangwe oyeye onuunu di timbi ngha inggise ngwu nu iYesu oyeye ba.

⁹ Ka lo owakwade onyi kpaa iyi mi mmbwo mgbi emi owakwade ba, se ni onova mgban nye ngwuseta, ongwu nsiikye nu oban mi eba mgban,

¹⁰ a di yen yi ali osuse saan, dafi ongwu nnye engbe mgban saan, gbe ingyoga beyi ama onoyeye mi ude mgban, di ya ama nto yi okakewo abo di kye itukwu mgban nu mi alungwo osuse okyɔkyɔ duu.

¹¹ Owakwade ama nka li ikyakyawa yo, ka kye ma iyi wo mmbwo owakwade ba na. Bana ni imina mgbi ongyulo wa lamyɛ ngha osunu iKrestu yo, a li mina obongyulo.

¹² Nghane ungwɔne li nu ma me ogbo ma ikwo, ikyekye a mbe ondu odzɛɛdze ngwi a dze ababo mani.

¹³ Ongyɛngye yo, a li yɛ emi ewewa dile kyikye mi ude ude kye. Onghaangha yo, a li yɛ ama odziidze di gbe abo sha odze kye di kye ondu wo odze ngwi a kika kye wo ba.

¹⁴ Nghane ani le we owakwade ama nka li ikyakyawa odze gbɛɛ nu ma bongyulo, nu ma mba

engbɛ, nu ma kyinebyi ude mgbi ama dika nu engyikyili mgbi eyi ofe ogbɔdze wɔɔ ikye eyi ba.

¹⁵ Mi odzimɔ yɔ, angbeka teyi kyata le kyedɔ iSatan kpaa wa.

¹⁶ Ni ongyaa ngwu noyɛye dze yi engyaa owakwade mi etɔ mgban yɔ, non ya ma abɔ, nu ma ka yɛe undo mbi emi iKrestu ba, adzi ni okwakye mgbi emi iKrestu kyinebyi owakwade ama ndze abubɔ mani.

¹⁷ Engyukwo ama nli di mi okwakye mgbi emi iKrestu saan ma, a mɛ onu ma mmwɛ dudɔ-dudɔ, onghaangha duu yɔ, ama ngwu idɔ mgbi ama li onu osa di tso mani.

¹⁸ Bana Afe gbɛɛ, <<Ka kye ikpele wo mnda nle gbo ungowogyowe ondu ba,>> Inggise idɔ <<Di mɛ okpan.>>

¹⁹ Ka yama gbela odze ngwi a gbe tukwu ongyukwo ogbe emi iKrestu teyi ewo ba se ni obwendɛ mɛ efa hona eta se.

²⁰ Kyɔkyɔ yi engyukwo ama nkyɔ obube mi ododa, ikyegbɛɛ angbeka nu ma wimio.

²¹ N le wo abu ola mi ine Imgbasho yi iKrestu iYesu beyi engyesɔ ama a sadu ma gbɛɛ, ka ngyo tsootso ntone yi ogbua-gbua ba, dika kyɔ unkonyi mi osadu-sadu ba.

²² Ka kye abɔ dɔ inggise ikye mi idɔ mgbi Imgbasho tsoli ba, dika gbe abɔ wo ali ibwubwe mgbi inggise angbeka ba, kye ewabu dze saan.

²³ Nya ole weni ewewe yuon, kpaa wa ebye gwee mi ikye ifu owulu-wulu mgbi abu beyi ikye ootse nli kaka abu ewo alonɔ-alonɔ nani.

²⁴ Ali ibwubwe mgbi inggise angbeka li daada ba, di li teyi ma kaka imbe ogbiikwɔ; kpaa ali

ibwubwe mgbi angbeka li daada, li wa fwitɔ mi iyikpa.

²⁵ Li ngha ngwi ungwɔ ama osuse kpaa li tɔ esɛ gedee aali, ama ntɔ esɛ ba kpaa a ka kye ma da gbɛ ba.

6

¹ Inggisɛ ama nwoto isɔ mgbi ofyɛɛ duu, nu ma kye engyukwo mgbi ama wuuta onu ma mmwɛ saan, ikyegbɛɛ inggisɛ onyi no ka gbɔdze obube mi iyi Imgbasho bɛyi otsootso mgbi eyi ba mani.

² Ofyɛɛ ama engyukwo mgbi ama li ama onoyɛɛ yɔ, nu ma ka kwu ma shanyɛ ba ikyekyɛ engyukwo mgbi ama kpaa li engwunɔ yi ama ungwonyi. Tatase yɔ, ni a nghao kyɔ ma idɔ saan, ikyesine ama nle tu oyabɔ mi idɔ mgbi ama li ama onoyɛɛ yi ama nkpaa ma itukwu. Ntone li ungwɔ ama abu ka tso diyɛ di gbɛɛ ali inggisɛ duu kyɔ mi ele aani.

Oshɔ awuya

³ Ni inggisɛ le tsungwɔ ngbela yi otsootso mgbi Otɛ mgbi eyi iYesu iKrestu bɛyi odzimgbasho otsitsi bayɔ,

⁴ o le kyile ewo esho, di ye unkonyi ba. Angwodze kpan, o di li gbɔnɔgbɛ mi odzɛ. Ungwɔnɛ li ba yi anyi yi ogbɔdze mi oweka yi ogbɔdze obube yi otɛwɛ gbɛɛ angbeka li inggisɛ osuse ba,

⁵ yi angwodze kpakpa. Inggisɛ ntone dze yi itukwu obube, di dze yi otsitsi mboma ba. A di tɛwɛ gbɛɛ, okyɔ odzimgbasho li ofɛ otu awuya.

⁶ Okyɔ odzimgbasho yi nggwɔ ba, li aludu ogbagbadzidzi.

⁷ Ikyesinɛ eyi kye unkonyi ba ɛsɛ ba, eyi dika yagba kye unkonyi mi ɛsɛ lu ba.

⁸ Nghanɛ ni eyi dze yi ungwogyɛ yi angwuto yɔ, no mɛ eyi.

⁹ Inggisɛ ama nmina oyɛɛ emi awuya yɔ, a li gbo mi igyila yi ukya yi ikwangha ungwɔ kwuba beyi imina ama obube nli nu inggisɛ boofɛ di dzili mani.

¹⁰ Bana akpa alungwɔ ibwubwe duu, kyɛ mi imina mgbi awuya. Inggisɛ angbeka yɔ, ngwi i fyi ma mi awuya nghanɛ, a boofɛ a dzata oyɛyɛ onuunu di kye ewoma woke ifu adzɛ kpakpa.

IPol wɛ iTimoti odzɛ ongwi olɛɛ

¹¹ Nghaduu abu inggisɛ Imgbasho yɔ, tsinya ungwɔ ntonɛ duu, kyɛdɔ ofɛ osaan, kyɔ Imgbasho idɔ yi oyɛyɛ onuunu yi okpitukwu mi itukwu oshiishi beyi odzɛ dumɔɔ.

¹² Gblika osuse mgbi oyɛyɛ onuunu nani. Kye abɔ byi oshishe ogyegwu ngwi Imgbasho kwu abu ela kye nu abu, ngwi abu kyɔ obwendɛ mi inai inggisɛ ibyi nani.

¹³ N le wɛ abu odzɛ mi inɛ Imgbasho nli kye oshishe nu alungwɔ duu na beyi iYesu iKrestu ongwu nkyɔ obwendɛ osuse mi inai iPontu iPlatu na gbɛɛ

¹⁴ ngyo ola nɛ saan, ɛndɛ hona obube no ka dze ele ba mbise ngwi Otse mgbi eyi iYesu iKrestu ka yidɔ.

¹⁵ Li Imgbasho ka kye ungwɔnɛ ba mi onɔ ngwi i gyɔlon mani; o li Imgbasho okwɔkwɔ di li Uto

yuon, o li Uto mgbi emi uto di li Otse mgbi emi otse.

¹⁶ Ongwu yuon ta ka kwulu ba, di li ongwu dze mi osa ngwi inggise ka yagba ke kwekwe yan ba, ongwu inggise din ye ba dika yagba din kpaa ba. Oshewo yi mfyee duu li mgban gyegwu. No dze ngha.

¹⁷ Nya emi awuya mi ese ongwu onene ne gbee, nu ma ka kyile ewo esho naadi gbe itukwu byi aludu nli nye suno ba ne ba, nghaduu nu ma kyi itukwu mgbi ama byi mbi Imgbasho ongwu nli nu eyi alungwo nka nu eyi dze myeemye mi oshishe dzii nani.

¹⁸ Tso ma okyo osuse, nu ma li emi aludu mi ungwwo osuse okyockyo, nu ma dze yi itukwu oghumba di shabota dzii.

¹⁹ Mi ito ofe ne, a ka kye aludu dze ewoma mi esho dafi itozu okpoklwo mi onwo ongwu iyayi, adzi nu ma kye abo byike oshishe nli oshishe oyeye nani.

²⁰ ITimoti, gbewedze ungwwo a kye wo abu abo nani, dzita ayayi onya okpaakpa nli mgbi Imgbasho ba yi angwodze ikwangha ngwi a li kwun di ozoyeye nli kye afo twese yi otsootso mgbi eyi otsitsi nani.

²¹ Ngwi inggise angbeka gbela ungwone di kyo ngha ne, a boofe mi oyeye onuunu. Elela mgbi Imgbasho no dze yi ema duu. No dze ngha.

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90